

## ZAPISNIK

sa 16. sjednice Upravnog odbora  
Skijaškog/Smučarskog saveza Bosne i Hercegovine, održane 26.12.2016. godine u 18.00 sati  
u prostorijama Ski saveza BiH u Sarajevu

**Prisutni:** Đelal Hasečić, Miro Đukić, Zdravko Lasica, Milovan Jevtović, Ismar Biogradlić, Kenan Jažić, Jasmin Mehić članovi Upravnog odbora, Jelena Dojčinović Generalni sekretar.

**Odsutni:** Muris Pozdrac, Mario Laikert, Radenko Pekić, Vladimir Lučić

Đelal Hasečić je otvorio sjednicu i predložio dnevni red.

### DNEVNI RED:

1. Usvajanje zapisnika sa 15. sjednice Upravnog odbora;
2. Izvještaji dosadašnjeg takmičarskog perioda: alpsko skijanje, ski trčanje, biatlon, snowboard
3. Stanje računa – potrošnja
4. FIS trka – Ravna Planina
5. Razno

Dnevni red je jednoglasno usvojen.

### Ad. 1.

Jasmin Mehić je dao komentar na zapisnik sa 15. sjednice a vezano za rokove prelaska takmičara iz kluba u klub. Mehić smatra da se treba držati pravilnika i da je nepravdano UO postupio kada je dozvolio prelazak takmičara iz jednog kluba u drugi mimo roka za prelazak. Također je naglasio da UO ne treba da raspravlja o ovakvim stvarima koje su propisane pravilnikom. Jasmin Mehić je objasnio o čemu se tačno radilo u ovom slučaju. Nije u redu da trener napusti klub 10 prije sezone i povuče sa sobom nekoliko takmičara.

**Hasečić je rekao da se prihvata komentar i da je potrebno da se za iduću sjednicu pripremi prijedlog izmjena pravilnika kako bi se što bolje regulisalo ovo pitanje.**

Nakon kraće rasprave članova UO i njihovih prijedloga prijedlog za izmjenu pravilnika je jednoglasno usvojen.

Zapisnik sa 15. sjednice je usvojen sa 7 glasova za i jednim glasom protiv.

### Ad.2.

Izvještaji sa dosadašnjih takmičenjima po sportovima.

Ski trčanje:

Koordinator komisije za Ski trčanje Kenan Jažić je dao kratki izvještaj o proteklim takmičenjima gdje je izdvojio Mladena Plakalović, Tanju Karišik, Kusmuk Sanju i Dejanu Košarac. Posebno je pohvalio Mladena Plakalović koji je napravio izuzetne FIS bodove dok su ostali bili na prošlogodišnjem nivou. Naglasio je da su s obzirom da je to bila prva FIS trka postignuti rezultati solidni.

Zdravko Lasica je naglasio da Mladen Plakalović sa osvojenih 56 FIS bodova trenutno ima osvojenju normu za nastup na Svjetskom kupu u ski trčanju što je izuzetno dobar rezultat.

Biatlon:

Koordinator za Biatlon komisiju Zdravko Lasica je rekao da Tanja Karišik kao i do sada dominira kada je riječ o biatlonu. Izrazio je žaljenje što Mladen Plakalović nije bolji u gađanju kako bi probao napraviti i dobar rezultat u biatlonu.

Ostali rezultati nisu baš dobri jer u jednom trimestru takmičari imaju pravo učešća dok u drugom trimestru to pravo gube i rezultati su na jako niskom nivou. Koristi se svaki odlazak sa maksimalnim brojem takmičara kako bi se dobijao novac za učešće.

Đelal Hasečić je nakon ovih izvještaja ponovo naglasio da je potrebno napraviti tematske sjednice po sportovima kako bi se napravili pomaci u radu i u ostvarivanju rezultata kako ne bi imali samo Tanju ili Mladena već da probamo pokušati napraviti situaciju gdje ćemo imati više takmičara koji će se priključivati najboljima.

Potrebno je da od predsjednika komisija dobijemo jasne stavove po pitanju stanja u sportu i pokušati pronaći rješenja kako bi se stanje još popravilo.

**Snowboard:**

Ismar Biogradlić je rekao da naši takmičari još nisu nastupali na FIS trkama jer su dosadašnja takmičenja bila daleko. Odrađene su dobre pripreme sa tri odlaska na glečer. Nastup na takmičenjima se očekuje od 02. januara 2017. godine.

Hasečić je rekao da tematska sjednica važi i za Snowboard te zamolio Ismara da se posveti problemima snowboarda detaljnije i jasnije.

**Alpsko skijanje:**

Jasmin Mehić koordinator Alpske komisije je rekao da u alpskom skijanju ima dosta dešavanja, da je bilo dosta trka. O rezultatima neće puno govoriti jer ih nije baš i bilo izuzev drugog mjesta Elvedine Muzaferije u Banskome. Također je naveo da su svi muškarci popravili svoje FIS bodove. Organizovana su takmičenja i u BiH što je veoma pozitivno uz malu mrlju što se desilo na Ravnoj planini ali o tome u posebnoj tački dnevnog reda.

Što se tiče tematske sjednice Alpskog skijanja Mehić je rekao da je kostur postavljen. Naglasio je da je lako organizovati tematsku sjednicu ali je potrebno odrediti aktere koji će implementirati zaključke sa sjednice. Iz tog razloga još nije formirana radna grupa koja će na tome raditi s obzirom da postoji dosta ljudi koji imaju različite interese, pripadaju različitim grupama, savezima, podsavezima itd. Svakako radi se na formiranju radne grupe i pripremanju materijala za tematsku sjednicu.

Đelal Hasečić je zatim rekao da je dobio sljedeću informaciju iz dva izvora a odnosi se na reprezentaciju u Alpskom skijanju. Utisak ljudi koji su mu to prenijeli su rekli da trener ne postavlja timsku atmosferu u timu. Hasečić je predložio i Jaminu Mehić ukoliko bude imao prilike da malo porazgovara sa trenerom Mirojević što će i sam uraditi. Potrebno mu je naglasiti da svi članovi A tima moraju biti ravnopravni. Mehić smatra da se Mirojeviću itekako mora skrenuti pažnja na njegove preuranjene procjene. Njegov posao je da gura sijelu reprezentaciju a ne pojedinca.

Zdravko Lasica se slaže sa diskusijom ali ne bi se složio da je za sve kriv Nedžad Mirojević. Lasica je naglasio je trener koga smo mi prihvatili i za to ga plaćamo. Lasica smatra da Mirojević ima problema sigurno i sa roditeljima, tako da ne treba za sve kriviti trenera.

Hasečić samo smatra da Mirojević treba da bude isti prema svima. Dojčinović je rekla da pretpostavlja o čemu se radi a to je problem u Banskome i odabir takmičara koji će nastupiti s obzirom da je kvota bila samo 2 a naših je bilo 4. Mirojević je prvobitno odlučio da voze takmičari sa lošijim bodovima ali zatim ga je organizator uslovio da to moraju biti oni sa boljim. Dojčinović je također napomenula da je psotojao dogovor o pomenutim bodovima koji su napravljeni prošle godine na Jahorini i to između trenera i takmičara. Dogovor je bio da se ti bodovi neće uzimati u obzir prilikom odabira takmičara za nastup kada su ograničene kvote na

dva. Mirojević je u konkretnom slučaju odlučio da to budu dva takmičara sa lošijim bodovima iz razloga što su isti na dotadašnjim trkama bili uspješniji.

Zdravko Lasica je zatim rekao da je to u redu da trener odluči o nastupima takmičara i da je sigurno prava osoba koja može i treba procjeniti u datom trenutku ko je spremniji i bolji za nastup.

Mehić je zatim rekao da trener treba da ima pravo odlučivanja ali to mora uvijek dobro potkrijepiti.

Ismar Biogradlić je rekao da se treneru treba dati sloboda u ovakvim odlukama.

Nakon duže rasprave u kojoj su učestvovali: Hasečić, Mehić, Lasica, Biogradlić usvojeno je da se trener mora držati pravilnika a to su trenutno FIS bodovi.

**Hasečić je zatim priveo ovu tačku kraju te predložio zaključak: da se izvještaji usvoje, i da se očekuju još bolji rezultati te da nema finasnijskih problema. Zaključak je jednoglasno usvojen.**

### **Ad. 3.**

Uvodnu riječ je dala Jelena Dojčinović objasnivši da trenutno stanje na računu nisu konačna, jer IBU sistem finansiranja je takav jer nakon svakog takmičenja po učešću dospjevaju sredstva.

Hasečić Đelal je zatim dodao da možemo biti zadovoljni finansijskim stanjem, da smo otprilike na 50% potrošnje, ali je također naglasio da su ulaganja bila konstantna. **Također je zamolio Dojčinović da za idući put spremi presjek potrošnje po sportovima.**

Po ovoj tački davnog reda nije bilo više rasprave.

### **Ad. 4.**

Uvodnu riječ je dala Jelena Dojčinović kazavši da se u materijalima nalazi protest upućen Savezu od strane Ski kluba ZE 2010 kao i prijedlog odgovora. U međuvremenu je pristiglo i otvoreno pismo Igora Šljuke koje se također nalazi u materijalu.

Đelal Hasečić je zatim dao nekoliko informacija poslije razgovora sa ljudima iz FIS. Naglasio je da je prvog dana bio prisutan na Ravnoj planini, te je pohvalio organizaciju takmičenja uz male nedostatke. Zatim je rekao da je obavio razgovor sa Flere Janezom iz FIS zbog dešavanja sa mjerenjem takmičarke Elvedine Muzaferija drugog dana takmičenja. Hasečić je kratko obrazložio šta se desilo sa vremenom takmičarke što je dovelo do određene sumnje. Iako je protest napravljen žiri je donio odluku da vrijeme ostaje kako je prvobitno pokazano. Međutim veći problem je nastao kada je trener Rejmon Horo naložio takmičarki da drugu vožnju vozi ali da posljednju kapiju ne prođe ispravno kao i da trećeg dana ne vozi trku. To je vjerovatno uradio u afektu ali ne opravdava njegovo ponašanje. Rejmon Horo se također obratio i FIS sa obrazloženjem šta se desilo, te tražio da FIS ispita dešavanja na takmičenju. U tom slučaju je također Rejmon postupio protiv pravila jer nije imao nikakvih dokaza da su povrijeđena pravila. Nakon što je FIS dobila izvještaj TD konstatovala je da je trka u redu i odobrila trku za FIS bodove.

Također je naveo da Rejmon Horo nije postupio prema pravilima i da je takmičarka trebala završiti drugu vožnju kao i to da je trebala voziti treći dan pogotovo jer se radilo o Juniorskom državnom prvenstvu, kako bi Savez onda mogao zvanično uložiti protest.

Također je nastupio i problem sa sponzorima koji prate rezultate iz razloga što takmičarska nije startala treći dan i učestvovala na Državnom prvenstvu. Trener se ponio amaterski u tom trenutku i to nije sporno. Ipak nakon nekoliko razgovora uspjeli smo zadržati sponzorstvo za takmičarku dok je trener Horo izgubio beneficije.

Hasečić je naglasio da nema sumnje da nešto nije bilo u redu jer je razlika bila prevelika ali da je trener Horo trebao reagovati drugačije. Predložio je da se uputi opomena treneru Horo da nema pravo da istupa prema FIS u ime Saveza na privatnoj osnovi i zatražiti izvinjenje.

Jasmin Mehić je rekao da je ovo što se dešavalo je jedan veliki problem i da se kao koordinator za alpsko skijanje veoma posvetio istom. Također je naglasio da je potrebno poslati zahvalnicu organizatoru jer je uspio u jako teškim uslovima kada nigdje nema snijega organizovati izuzetno kvalitetne trke tokom tri dana. Ipak kada je u pitanju događaj koji je unio dosta nemira u reprezentaciju pa i Savez. Mehić je ukratko obrazložio prisutnima šta se desilo sa impulsima i ručnim mjerenjem i da je neupitno da je trka pokradena. Ipak mi smo napravili nekoliko protesta. Prvi protest je da Rejmon Horo nije mogao uložiti protest već je to trebao uraditi Nedžad Mirojević zvanični trener reprezentacije. Sve i da trener nije uložio protest mi smo trebali postupiti po pismu ski kluba ZE 2010 i poslati protest. Ali to nismo uradili već smo pravili neke interne analize i izgubili mogućnost za podnošenje protesta u određenom roku prema FIS. Samim tim smo onda otvorili vrata da Rejmon Horo privatno proba da ispravi nepravdu. Hasečić je zatim rekao da mi nismo trebali ništa slati jer je takmičarka diskvalifikovana u drugoj vožnji. Mehić je zatim ponovno rekao da zbog naše strukture Savez ne može brzo reagovati. Također je rekao da i Nedžadu Mirojević treba uputiti upozorenje i nije uložio protest. Zatim je Zdravko Lasica rekao da Horo nije tako pričao po društvenim mrežama i nije spominjao Mirojevića, već Savez.

Mehić Jasmin je naglasio još jednom da je propust napravio Mirojević što nije uložio protest. Zatim je Dojčinović s obzirom da je bila prisutna na takmičenju objasnila kako se šta dešavalo ne želeći nikoga opravdavati. Horo Rejmon je zamolio Mirojević Nedžada da uloži protest s obzirom da je on morao postavljati stazu za drugu vožnju. Mirojević je otišao do zapisničkog stola ali nije uložio zvanični protest. Svakako to jeste neiskustvo trenera ali je i TD bio ubjeđen da će ručno mjerenje pokazati da elektronsko mjerenje nije bilo u redu pa je rekao Mirojević nema potrebe za protestom jer će to sve biti u redu i sam sam vidio takmičarku kako je vozila. Nakon što je TD pogledao kartone ručnog mjerenja ispostavilo se da se poklapa sa elektronskim a onda je već bilo kasno za ulaganje zvaničnog protesta. To svakako ne opravdava Mirojević Nedžada što nije uložio protest. Također je naglasila da je lično rekla treneru Horo da takmičarka treba da vozi trku.

Jasmin Mehić je zatim rekao da se treba držati papira i da je potrebno kritikovati Mirojević Nedžada zbog neulaganja zvaničnog protesta kao Rejmona Horo zbog niza propusta. Također je rekao da ni gospodin Dekleva TD nije osvjetlao svoj obraz je rnije u radio svoj posao kako treba. Dojčinović kao TD također je rekla da u pravilima nigdje to ne piše ali da je Dekleva mogao donijeti odluku u korist takmičarke. I sama je rekla da je to veliko iskustvo i za nju i da je nekoliko puta detaljno pročitala pravila i da je to bilo moguće tako odlučiti.

Nakon duže rasprave po ovoj tački dnevnog reda predloženo je nekoliko zaključaka:

- 1. Hasečić Đelal je kao prvi zaključak predložio da se od Rejmona Horo zatraži pismeno izvinjenje Savezu za svoje nepromišljene postupke jer u suprotnom neće biti podržan od strane Saveza u budućnosti. Zdravko Lasica je dodao da ukoliko odbije da dostavi izvinjenje ne bi trebao ići na Svjetsko prvenstvo u St. Moritz. Zaključak je jednoglasno usvojen.**
- 2. Kao drugi zaključak Hasečić je predložio da se pošalje zahvalnica tehničkom organizatoru za kvalitetno održane trke uz nekoliko manjih propusta. Zaključak je jednoglasno usvojen.**
- 3. Kao treći zaključak Hasečić je predložio da treba da se razmišlja o nabavci nove mjerne garniture uključujući štoperice sa trakama, te da pokušamo obučiti ljude koji će raditi na istom. Savez treba da ima mjerenje pod svojom ingerencijom. Ismar Biogradlić je kada je u pitanju mjerenje skrenuo pažnju da prema cjenovniku Saveza mjerioci vremena imaju male finansijske naknade i da je zbog obima njihovog posla neophodno da se iste povećaju. Kenan Jažić je predložio da se prilikom prikupljanja ponuda za mjernu garnituru uzme i razmatranje nabavke transpondera za ski trčanje. Svi navedeni zaključci su jednoglasno usvojeni.**

4. I kao posljednji zaključak po ovoj tački dnevnog reda Hasečić je predložio da Dojčinović Jelena i kao Generalni sekretar saveza i kao TD mora biti uključena u organizaciju svakog FIS takmičenja kako bi se ispunili svi tehnički uslovi za organizaciju i kako bi se izbjegli ovakvi slučajevi o kojima se raspravljalo. Ukoliko je Dojčinović u tom trenutku zauzeta onda to treba da preuzme predsjednik komisije. Također je potrebno da se sklope ugovori sa tehničkim organizatorima s obzirom da je Savez i vlasnik ovih trka.  
**Jednoglasno usvojen zaključak.**

#### Ad.5.

Pod tačkom razno raspravljalo se o nekoliko stavki:

- Hasečić je predložio a s obzirom da se ovoj sezoni ostvaruju olimpijske norme na posljednje dvije FIS trke koje su nam preostale potrudimo sa tehničkim organizatorima da dovedemo kvalitetnije takmičare sa dobrim bodovima kako bi dali šansu i našim takmičarima da spuste bodove i pokušaju da ostvare olimpijsku normu. S tim u vezi je predložio da Savez novčano stimuliše organizatore kako bi doveli bolje takmičare. Novčana sredstva bi se isplatila u smislu nagrade. Hasečić je predložio da se izdvoji iznos iz rezervnih sredstava i po 3.000 KM pomogne tehnički organizator za novčane nagrade. Ukoliko to ne uradimo vrlo teško ćemo dovesti dobre takmičare.  
Ismar Biogradlić je rekao da mu se to ne sviđa da se Savez dovodi u konotaciju štimanja takmičenja sa čime se složio i Zdravko Lasica. Hasečić je zatim rekao da to nije štimanje rezultata već da Savez daje to u vidu novčanih nagrada koje tehnički organizatori nisu u mogućnosti obezbijediti pord svih drugih troškova. Zatim je Dojčinović rekla da postoji mogućnost da na ovu odluku bude i žalbe od prethodnih organizatora kao što je SK Pale. Zatim je Hasečić rekao da se odluka donosi sada za dobrobit naših takmičara.  
**Nakon kraće rasprave jednoglasno je usvojeno da se za 6 FIS takmičenja i to: 1 snowboard, 2 ski trčanje i 3 alpsko skijanje izdvoji po 1.400 EUR za svako takmičenje i to isključivo za nagrade.**
- Zdravko Lasica je zatim pitao prisutne hoće li se organizovati Proglašenje najboljih za proteklu sezonu, i to na molbu predstavnika SPD Jahorine koji nažalost večeras nisu prisutni na sjednici. Dojčinović je rekla da smo probali organizovati ali da je već sezona bila krenula i da se nije mogao naći prikladan termin. Milovan Jevtović je predložio da se napravi u narednih 10 dana. Ipak Dojčinović je rekla da to ne bi bilo u redu jer najbolji takmičari ne bi bili prisutni. **Na kraju kraće rasprave predloženo je da se proglašenje najboljih napravi i za prethodnu i za tekuću sezonu na isti datum po završetku sezone. Jednoglasno je usvojen prijedlog.**
- Hasečić je rekao da Dojčinović treba da za svaku sjednicu pripremi dokument sa realizacijom zaključaka kao i da u zapisniku svi zaključci budu boldirani kako bi bili uočljivi. Napomenuo je da se treba realizovati i zaključak prijedloga pravilnika o nagrađivanju zaslužnih sportista, sportskih radnika. Jasmin Mehić je rekao da se taj prijedlog pravilnika treba praviti kada završi sezona kada bude više vremena za takve stvari. Dodao je da se Dojčinović veoma potrudila za organizaciju FIS takmičenja na Ravnoj planini ali da medijski to nije bilo praćeno. Hasečić se sa tom izjavom složio te predložio da se razgovora sa Nerminkom Emrić koja već ima iskustva u ovim sportovima ali da je potrebno izdvojiti i finansijska sredstva za takvu uslugu. Njen posao je da plasira naša obavještenja prema medijima kako bi se kvantitet naših objava povećao.

**Jednoglasno je usvojen zaključak da Dojčinović obavi razgovor sa Emrić Nerminkom i pokuša dogovoriti da nam pomogne sa medijskom pažnjom.**

- Dojčinović je kratko obrazložila da je došlo pismo predsjednika Alpske komisije o načinu rada. Mehić je ukratko rekao da je trenutno Alpska komisija neefikasna ali da ovu temu treba ostaviti za April mjesec nakon što sezona završi. **Jednoglasno je usvojeno da se ovo ostavi za tematsku sjednicu nakon sezone.**
- Dojčinović je na kraju sjednice ukratko obavjestila članove UO o planovima reprezentacija po sportovima za prvu polovinu januara. S obzirom da naši reprezentativci Šljivić i Muzaferija trebaju nastupiti na Svjetskom kupu u Zagrebu Hasečić je iskoristio priliku i obavjestio prisutne da je on kao predsjednik Saveza pozvan na isto takmičenje kao i obilježavanje 50 godina svjetskog kupa. Također je stigao poziv i za Dojčinović te da ukoliko nema niko ništa protiv da Dojčinović i Hasečić odu na ovo takmičenje. Svi članovi UO su podržali odlazak Hasečić i Dojčinović za odlazak u Zagreb na svjetski kup.
- **Hasečić je zamolio Dojčinović da knjigovodstvo dostavi informaciju u smislu blagajničkog izvještaja, kao i da se završi realizacija zaključka o popisu imovine. Potrebno je da se napravi stanje sa 31.12.2016. godine od knjigovode kao i od komisije za popis.**

Sjednica je završena u 20.00 sati.

Originalni materijali sa sjednice Upravnog odbora Ski saveza BiH prilažu se primjerku Zapisnika koji se odlaže u arhivu Ski saveza BiH.

Sarajevo,  
26.12.2017.

Zapisnik vodila  
Jelena Dojčinović

Predsjednik  
Đelal Hasečić